

- भारतीय जनता पार्टी रा आला नेता अर प्रधानमंत्री नरेन्द्र मोदी कोटपूतली कने चुनावी सभा कीनी-राज्य रा पैली वाळा मुख्यमंत्री अशोक गहलोत जोधपुर अर पाली मांय नामांकन रैलियां ने संबोधित कीनी।
- लोकसभा चुनाव रे दौरान गैर कानूनी साज-ओ-सामान अर नकदी जब्त करण रा मामला मांय राजस्थान देश मांय अव्वल-हाल ताई 500 करोड़ रुपया मोल री गैर कानूनी शराब, दूजी सामग्री अर नकदी जब्त करीजी।
- मुख्य सचिव स्वतंत्र अर बिना डर्या वोट देवणो तैय करण सारू अपराधियां री पिछाण कर र वां रे खिलाफ करडी कार्रवाई रा हुकम दीना।
- राज्य मांय पारो साढे चार डिग्री सेल्सियस ताई उतर्यो- मौसम विभाग जयपुर अर बीकानेर संभाग मांय काल कठे-कठे हल्की बिरखा रा आसार जताया।

000

भारतीय जनता पार्टी रा आला नेता अर प्रधानमंत्री नरेन्द्र मोदी लोकसभा चुनाव रा तैत आज कोटपूतली कने राजस्थान मांय पहली चुनावी सभा ने संबोधित कीना। प्रधानमंत्री कह्यो के ओ सामान्य चुनाव नी है, बल्कि विकसित भारत अर विकसित राजस्थान रो चुनाव है। वे कह्यो के ओ चुनाव भारत ने दुनिया री तीजी मोटी माली व्यवस्था बणावण अर खुद रे पाण ऊबो भारत बणावण रा संकल्प रो चुनाव है। वे भ्रष्टाचार खत्म करण री कोशिशों रो ई जिकर कीनो।

कांग्रेस अर वां सागे गठबंधन मांय शामिल सियासी पार्टियां री आलोचना करता थकां वे कह्यो के विपक्ष री पार्टियां देश सारू नी बल्कि पिरवार सारू चुनाव लड़ रही है। प्रधानमंत्री कह्यो के देश ने समृद्ध बणावण सारू ओ चुनाव घणो खास है। वे कह्यो के लारली सरकार मांय ज्यां री कोई पूछ नी ही, वां ने वां रा राज मांय पूजी ज्या है। पूर्वी राजस्थान कैनाल परियोजना-ईआरसीपी रो जिकर करता थकां वे कह्यो के कांग्रेस ई परियोजना ने बरसां ऊं लटका रखी ही, पण भाजपा ई काम माथे खास ध्यान दीनो।

वे कह्यो के देश ने ज्यीं गति री जरूरत ही, वां गति ऊं काम करी ज्यो है। वे कह्यो के काल ही भारत दूजा देशां ने रक्षा ऊं जुड़्या साज-ओ-सामान बेचण रो नुवा रिकॉर्ड कायम कीनो है। प्रधानमंत्री कह्यो के भारत आज 80 ऊं बत्ता देशां ने रक्षा ऊं जुड़्या साज-ओ-सामान बेच रह्यो है। दूजी कानी कांग्रेस रा प्रदेश अध्यक्ष गोविंद सिंह डोटासरा, राज्य रा पैली वाळा मुख्यमंत्री अशोक गहलोत अर पार्टी रा आला नेता पाली अर जोधपुर मांय पार्टी रा उम्मीदवारां री नामांकन रैलियां ने सम्बोधित कीना। पाली मांय राखी ज्यी नामांकन रैली मांय डोटासरा कह्यो के राज्य मांय कांग्रेस री लारली सरकार चोखो काम कीनो। राज्य रा पैली वाळा मुख्यमंत्री अशोक गहलोत जोधपुर मांय कांग्रेस रा उम्मीदवार री हिमायत मांय राखी ज्यी सभा मांय कह्यो के केन्द्र सरकार री योजनावां ऊं राजस्थान री जनता ने कोई फायदो नी मिल्यो।

0000

लोकसभा चुनाव रा दूजा दौर रा तैत राज्य मांय नामपाना दाखिल करण सारू अब केवल 2 दिन और बच्चा है। आज भारतीय जनता पार्टी अर कांग्रेस रे अलावा दूजी पार्टियां रा अर कुछ निर्दलीय उम्मीदवार पर्चा दाखिल कीना। भारतीय जनता पार्टी रा प्रदेश अध्यक्ष सी.पी. जोशी आज चित्तौडगढ़ लोकसभा सीट ऊं नामजदगी रो पर्चो दाखिल कीनो। झालावाड़ लोकसभा हलका ऊं भाजपा रा उम्मीदवार दुष्यंत सिंह ई पर्चो दाखिल कीनो। टोंक-सवाईमाधोपुर लोकसभा सीट ऊं भाजपा रा उम्मीदवार सुखबीर सिंह जौनापुरिया ई पर्चो दाखिल कीनो। पाली लोकसभा हलका ऊं कांग्रेस री उम्मीदवार संगीता बेनीवाल अर जोधपुर ऊं कांग्रेस रा उम्मीदवार करण सिंह उचियारड़ा ई आज नामजदगी रा पर्चा दाखिल कीना।

0000

राज्य मांय न्यारी-न्यारी एनफोर्समेंट एजेंसियां मार्च महीना ऊं हाल ताई नशीली दवाइयां, शराब, कीमती धातुवां, मुफ्त बांट्या जावण वाळा सामान अर गैर-कानूनी नकदी रा रूप मांय करीब 500 करोड़ रुपया रा सामान जब्त कीना है, जो देश मांय सब ऊं बत्ता है। लोकसभा चुनाव रे दौरान चुनाव आदर्श आचार संहिता लागू व्ह्या पाछे 16 मार्च ऊं हाल ताई न्यारी-न्यारी एजेंसियां कानी ऊं पकड़ी ज्या सामान रो मोल 400 करोड़ रुपया ऊं बत्तो है। जोधपुर मांय सब ऊं बत्ता 39 करोड़ 31 लाख रुपया रा मोल रा सामान अर नकदी पकड़ी ज्यी है। राज्य रा 17 जिला मांय 13 करोड़ रुपया ऊं बत्ता मोल रा सामान जब्त करी ज्या है। ध्यानजोग है के लोकसभा चुनाव रे दौरान राज्य मांय पुलिस, राज्य एक्साइज, नारकोटिक्स विभाग अर आयकर विभाग करड़ी निगरानी राख रह्या है।

000

मुख्य सचिव सुधांश पन्त कह्यो है के वोट देवण वाळां ने स्वतंत्र अर बिना डर वोट देवण रो वातावरण मुहैया करावणो पुलिस री जिम्मेदारी है। वे चुनाव माथे असर डालवा री मंशा राखण वाळा अर जनता मांय डर पैदा करण वाळां री पिछाण कर र वां रे खिलाफ करड़ी कार्यवाही रा हुकम दीना।

वे आज जयपुर मांय लोकसभा चुनाव रे दौरान कानून व्यवस्था रा बारा मांय पुलिस महकमा रा अहलकारां सागे मीटिंग मांय बोल रह्या हा। मीटिंग मांय पुलिस महानिदेशक उत्कल रंजन साहू कह्यो के लोकसभा चुनाव शांति सागे करावण सारू संवेदनशील हलकां मांय असरदार कार्यवाही करी जा रही है अर पड़ौसी राज्यां सागे तालमेल ऊं सरहदी हलकां मांय खास चौकसी राखी जा रही है।

000

प्रदेश मांय लोकसभा चुनाव सारू जोर-शोर ऊं तैयारी चाल रही है। जयपुर लोकसभा हलका अर जयपुर ग्रामीण लोकसभा हलका मांय 19 अप्रैल ने पड़बा वाळा वोटों सारू 4 हजार ऊं बत्ता मतदान केन्द्र अर सहायक मतदान केन्द्र बनायी ज्या है। जयपुर सीट माथे चुनाव सारू 1 हजार 842 मतदान केन्द्र अर 243 सहायक मतदान केन्द्र बनायी ज्या है, जद के जयपुर ग्रामीण हलका सारू 2 हजार 8 मतदान केन्द्र अर 120 सहायक मतदान केन्द्र बनायी ज्या है। सवाईमाधोपुर मांय जिला निर्वाचन अधिकारी डॉ. खुशाल यादव अर एस.पी. ममता गुप्ता खेरदा एसएसटी चैक पोस्ट अर एफएसटी टीम री ओर ऊं लोकसभा चुनाव मांय रोक लगायोडी सामग्री री रोकथाम सारू औचक जांच कीनी अर मतदान केन्द्रों रो औचक दौरों कीनो।

0000

प्रदेश मांय निर्वाचन विभाग री ओर ऊं न्यारा-न्यारा नवाचारां रे मार्फत वोट देवण सारू जाग जगावण सारू लगातार कोशिशों करी जा रही है। बूंदी मांय मत योग जागृति अभियान रा तैत वोट देवण रा बारा मांय युवा-परिचर्चा अर संगोष्ठी राखी ज्यी। सांचौर रा सरकारी कॉलेज मांय मतदाता जागरूकता गायन होड़ राखी ज्यी। जैसलमेर जिला रा स्कूल-कॉलेजां मांय नुवा मतदातावां रा स्वागत कार्यक्रम राखी ज्या। आं कार्यक्रमों मांय वीएचए, सक्षम, केवाईसी, सी-विजिल अर 1950 एप री जाणकारी दीरीजी। भरतपुर मांय नुकड़ नाटक रे मार्फत "वोट डारबे जरूर जइयो" थीम माथे मतदातावां मांय जाग जगायी

ज्यी अर वोट देवण रा महत्व री जाणकारी देता थकां मजबूत भारत बणावण सारू वोट जरूर देवण री अपील करीजी। शहर री एसटीसी हाउसिंग बोर्ड कॉलोनी मांय संवारे री सैर सारू आवण वाळां ने "पहले मतदान फिर कोई काम" रो संदेश दियो ज्यो।

चूरू ज़िला मांय स्वीप कार्यक्रम रा तैत बींद ने घोड़ी माथे बिठा र बाजा सागे वोट बारात निकाळी ज्यी। आंगनबाड़ी कार्यकर्ता ई रैली निकाळ र वोट जरूर देवण रो संदेश दीनो। केकड़ी मांय सरकारी स्कूलां अर कॉलेजां रा विद्यार्थियां, आंगनबाड़ी कार्यकर्तावां, वोट मित्रां अर राजीविका सखियां ऊं मतदातावां रे नाम आमंत्रण पत्र लिखवायी ज्यो। केकड़ी मांय मतदाता जागरूकता सारू दिव्यांग वृद्ध जन सम्मेलन ई राख्यी ज्यो। जोधपुर मांय मतदान वाटिका कार्यक्रम रा तैत बिलाड़ा, पीपाड़ अर भोपालगढ़ समेत न्यारी-न्यारी पंचायत समितियां मांय रैली अर जन-जागरूकता रा कार्यक्रम राख्या जा रह्या है।

000

लोकसभा चुनाव मांय वोट देवण बाबत् जाग जगावण सारू आकाशवाणी समाचार जयपुर री ओर ऊं संदेश श्रृंखला चलायी जा रही है। आप संदेश रिकॉर्ड कर र या टाइप कर र म्हाणा व्हॉट्सअप नम्बर 94140-52368 माथे भेज सको हो। चुणी ज्यो संदेश म्हाणा न्यारा-न्यारा समाचार बुलेटिन मांय भेळा कर्या जावेला। नागौर जिला रा खींवसर ऊं पूनाराम मांड्यो के-

फिर घंटी बज चुकी है, आने वाले चुनाव की  
आओ मिलकर हम सब मतदान करेंगे।  
अम्मा-बहना-काकी-चाची, सुन लो तुम भी भैया भाभी,  
है चुनाव अब जल्दी आने वाले, घर-घर पहुंचे नेताजी,  
करके सवाल, सच झूठ की पहचान करेंगे,  
आओ मिलकर हम सब मतदान करेंगे।

000

राज्य मांय पारो थोड़ो और उतर्यो है। मौसम विभाग ऊं मिली जाणकारी रे मुजब लारला 24 घंटा मांय सामान्य ऊं साढे 4 डिग्री सेल्सियस ताई कम तापमान दर्ज करी ज्यो। सब ऊं बत्तो 37 दशमलव 7 डिग्री सेल्सियस तापमान डूंगरपुर मांय दर्ज करी ज्यो। राजधानी जयपुर मांय पारो दिन री बगत करीब 2 डिग्री सेल्सियस ताई उतर र साढे 34 डिग्री सेल्सियस दर्ज करी ज्यो। चूरू मांय दिन री बगत तापमान सब ऊं बत्तो 4 दशमलव 6 डिग्री सेल्सियस उतर्यो। ई बीच मौसम विभाग काल जयपुर अर बीकानेर संभाग मांय कठे-कठे बिरखा व्हेवण रा आसार जताया है।

0000